

Fotografau, fatg teater e perscrutau l'atgna identitad

Pli varionta havess l'jamna da focus dil gimnasi dalla claustra da Mustér strusch saviu esser. Ils students ein sefatschentai dall'impurtonza dall'emoziun tier las fotografias, dil process dil far teater, cull'atgna identitad ni era da lungatg parentai.

HANS HUONDER/FMR

L'jamna vargada ei stada alla scola media dalla claustra da Mustér ell'enzenza da projects. Las sis classas ein sefocustadas sin differents temas. Per part ei quei succediu ellas localitads dil gimnasi, per gronda part denton era ordeifer. Tgi ei stau a Trun, Blinzuna, Tirol dil sid ni era a Nyon. Aschia han las studentas ed ils students buca mo empriu d'enconuscher autras regiuns, mobein han era saviu sededicar leu als temas dall'jamna. Davart l'jamna da focus dalla classa 5G cul tetel «Spéctacle in der Scala» – art cumbinau cun musica – han las scolaras ed ils scolars rapportau sezs ell'ediziun da La Quotidiana dalla gievgia passada.

Glisch ed emoziuns

Fotografar ei oz omnipresent. Cul telefonin ei era gest la camera adina el sac da caultschas. Fotografar ei denton buca semplamein fotografar, vul ins in resultat che cuntenta. Per quei motiv ei la classa 2G sefatschentada dil

film e la foto ils dis da focus. Dus fotografs e filmaders professiunals ei stai a disposiziun e han dau cussegls sin tgei mirar: Effect dalla glisch, emoziuns, filmar discuors, scenas specialas e carstgauns sin viadi. Las studentas ed ils students han tagliau sezs lur registraziuns e viu che quella lavur ei medemamein interessanta e fascinonta. Quell'jamna da focus ha purschiu als participonts la caschun d'experimentar, sviluppar atgnas ideas ed aschia da rimnar novas experientschas cun fotografar e filmar. «Quels dis havein nus sentiu che quei tema cumbinaus cullas medias modernas fascinescha. La motivaziun ed il plascher d'experimentar ein lu era stai veseivels», di pader Paul Tobler.

«La gruppa ha viu e sentiu che mintga singul ei impurtonts per in toc da teater. Ei drova pia mintgin per ch'il collega sappi funcziunar.»

David Flepp, pedagog da teater

La metodica da far teater

Ils dis da focus dalla classa 3G ein stai ell'enzenza d'ina regla da s. Benedetg: «S'anzar cun cor aviert». Il «cor» el center dil teater. Ensem cul pedagog da teater David Flepp ei vegniu experimentau ed exercitau da far teater era cun risguard dalla musica e dil lungatg romontsch. Per la fin dall'jamna – il venderdis – ei vegniu dau investa ella lavur als geniturs ed interessai. Quei ei succediu cun agid da singulas impressiuns ed in'investa ella metoda da luvrar. «Grazia a quella lavur ei la classa carschida ensem, pertgei biars scolars da quella ein da niev al gimnasi», di pader Paul e David Flepp completescha: «La gruppa ha viu e sentiu che mintga singul ei impurtonts per in toc

da teater. Ei drova pia mintgin per ch'il collega sappi funcziunar.»

Danunder vegn jeu?

D'in tema fetg complex, mo buca meins interessants ei l'emprema classa dil gimnasi sefatschentada. Il tetel: «Ad fontes» - allas fontaunas. Ils pli giuvens dil gimnasi ein i sils fastitgs dalla historia dalla claustra e da lur agen origin. Leutier ein els sefatschentai dallas fontaunas naturalas e culturalas dalla regiun sco la cuntrada ni la materia prima, mo era las fontaunas internas e naturalas. Els ein serendi denter auter alla fontauna dil Brenno sil Pass Lucmagn. «Scuntradas e diaconia interreligiusa» ei stau il tema dalla classa 4G. En quei connex ein ils scolars sescuntrau cun giuvenils dalla cardientscha giudaica ed ein stai en tempels da sikh, da thai-budda e hindu. Els ein denton era sefatschentai dalla problematica da drogas ed ein s'entupai cun carstgauns cun impediments. En quei connex han els era fatg exerchezis per saver co igl ei per exempel sch'ins vesa ni auda nuot.

Tiels Ladins dallas Dolomitas

La classa 6G – quella che fa matura quest onn da scola – ei stada engaschada en differents loghens: Tgi ellas Dolomitas, tgi ella Svizra franzosa e tgi el Tessin ed il nord dall'Italia. El Tirol dil sid ein ils students sefatschentai dalla cultura e dil lungatg ed ella Svizra franzosa cun basa a Nyon dil flair da lezza regiun. Vi-setas da museums, teater e cinema ein stai sil program. In semegliont program ei staus quel el sid dalla Svizra, denter auter cun in di a Milaun ed alla Scola svizra Milaun. In'investa ella cultura e scuntradas cun classas han cumplettau quell'jamna culla staziun principala a Blinzuna.